

costi X p. I, capparidis radicis X p. I, hederæ nigrae bacarum X p. II, periclymeni, quam silvæ matrem vocamus, pondus victoriati, galbani pondus victoriati, cardami nigri, id est nasturcii, seminis X p. II, et victoriati, piperis nigri X p. I, scillæ coctæ X p. XII. hæc omnia colliguntur melle, fiunt globuli. dantur pondere X duum vel unius ex melle et aceto mixtis cyathis quattuor aut tribus. eadem facit ad hydrogicos bene ex aqua mulsa, urinam movet.

CXXX. Lienosos sanat extra impositum: sinapis sextarius unus maceratus et tritus adiecto sextario uno lentis aceto coctæ. oportet autem impositum esse medicamentum, donec dolorem pati non possint; postea solio calido demittantur, ubi plures eos contineant, dum desinat dolor; alioquin exilient: maior enim fit dolor calda tactis; postea ceratum ex rosa imponere oportebit.

CXXXI. Aliud eadem ratione impositum melius facit: sinapis sextarium, git cyathos duos, nasturei cyathos quattuor, myrobalani corticis cyathos quattuor, piperis cyathos duos. sinapi aceto acri pridie maceratum, deinde tritum, contusum ceteris miscetur. in panno inlitum medicamentum imponitur, fascia quam longissima alligatur vel pluribus in unum commissis, quo tardius solvatur. hoc est efficacissimum et multorum annorum tollit duritiam. sed post hoc si quæ reliquiae remanserint, ammoniaco tollendæ erunt et rubo.

CXXXII. Infantibus lienosis dare oportebit aquam, in qua candens ferrum demissum <est>, vel lac caprinum capra tantummodo hederæ pa-